

性理大中

性理大中卷之十九

錢塘應撝謙嗣寅父編集

河陽趙士麟玉峯父鑒定

賞罰

程子曰。萬物只是一个天理。已何與焉。至如言天討有罪。五刑五用哉。天命有德。五服五章哉。此都只是天理自然當如此。○聖人所知。宜無不至也。聖人所行。宜無不盡也。然而書稱堯舜。不曰刑必當。罪賞必當。功而曰罪疑唯輕。功疑唯重。與其殺不辜。寧失不

經

華陽范氏曰。人君賞一人而天下莫不勸。罰一人而天下莫不懼。豈其力足以勝億兆之衆哉。處之中理而能服其心也。用一不肖而四方莫不解體。殺一無罪而百姓莫不怨怒。豈必人人而害之哉。處之不中理而不能服其心也。

武彝胡氏曰。人主以天下爲度者也。所好當遵王道。不可以私勞行賞。所惡當遵王路。不可以私怨用刑。其喜怒當發必中節。和氣綢繆而有萬物也。

朱子曰。古之欲爲平者。必稱其物之大小高下。而爲其施之多寡厚薄。然後乃得其平。若不問其是非曲直。而待之如一。則是善者常不得伸。而惡者反幸而免。以此爲平。是乃所以爲大不平也。故雖堯舜之治。旣舉元愷。必放共驩。此又易象所謂遏惡揚善。順天休命者也。

### 法令

程子明曰。必有關雎麟趾之意。然後可行周官之法度。○三王之法。各是一王之法。故三代損益。文質隨

時之宜。若孔子所立之法。乃通萬世不易之法。孔子于他處。亦不見說。獨答顏淵云。行夏之時。乘殷之輅。服周之冕。樂則韶舞。此是於四代中舉這一個法式。其詳細雖不可見。而孔子但亦言其大法。使後人就上脩之。○古之人重改作。變政易法。人心始以爲疑者有之矣。久而必信。乃其改作之善者也。始旣疑之。終不復信。而能善治者。未之有也。○爲政必立善法。俾可以垂久而傳遠。若後世變之。則末如之何矣。元城劉氏曰。人君命令。雖在必行。苟處之得其理。則

執之不可變。惟其不合衆望。違拂人情。所宜擇善。何憚改爲。

龜山楊氏曰。立法要使人易避而難犯。至于有犯。則必行而無赦。此法之所以行也。

撝謙曰。此如法令官吏犯贓者死。而祿不足以贍其父母妻子。則爲官何能使之不犯贓。然則行贓吏之法。必重祿以贍其家。使犯吾法者。必其貪者也。然後可以必行而無赦。

朱子曰。朝廷紀綱。尤所當嚴。上自人主。以下至于百

執事各有職業。不可相侵。蓋君雖以制命爲職。然必謀之大臣。叅之給舍。使之熟議。以求公議之所在。然後揚于王庭。明出命令而必行之。是以朝廷尊嚴。命令詳審。雖有不當。天下亦皆曉然知其謬之出于某人。而人主不至獨任其責。臣下欲議之者。亦得以極意盡言而無所憚。此古今之常理也。

揚謙曰。爲治之始。但是苟且而不立長久之法。皆亂世也。帝王欲齊民創業垂統。必同律度量衡。辨宮室車服上下。至于田賦經界。學校貢舉。銓選訓

練等類必皆講盡善無弊之法而謹守之。

井田 屯田 限田

程子二嘗與張子厚論井地。曰地形不必謂寬平。可以畫方。只可以用算法折計地畝以授民。子厚謂必先正經界。經界不正。則法終不定。地有均埴。不管只觀四標竿中間地雖不平。饒與民無害。就一夫之間所爭亦不多。又側峻處田亦不甚美。又經界必須正南北。假使地形有寬狹尖斜。經界則不避山河之曲。其田則就得井處爲井。不能成就處。或五七。或三四。



或一夫。其實四數則在。又或就不成一夫處。亦可計百畝之數而授之。無不可行者。如此則經界隨山隨河。皆不害于畫之也。苟如此。雖便使暴君汚吏。亦數百年壞不得。經界之壞。亦非專在秦時。其來亦遠。漸有壞矣。又曰。井田今取民田。使貧富均。則願者衆。不願者寡。正叔言亦未可言。民情怨怒。正論可不可爾。須使上下都無怨怒。方可行。

摛謙曰。經界之正。難者在奉行之人。若立法亦易。今若攷正尺律。頒度于天下。使天下州縣。凡一鄉。

之地。方百步之內。各立一界石。方千步之內。各種一界樹。以指南。定東西南北。無使至邪。洵然。然後使人丈量。各計分畝。田若干。水若干。畝地若干。平原若干。道徑若干。山林若干。下隰若干。一里之中。若干。屬彼若干。屬此。必無遁矣。其邊水邊山。依弧曲勾股折筭。然後依界樹畫方爲圖。凡一州一邑。皆了如指掌。○橫渠言均田。願者衆。不願者寡。非也。天下事無論利害。總不可使貧者無故而得田。富者無故而失田。蓋貧者必有貧之由。富者必有

其富之由。賞游手而奪祖遺。可謂平乎。彼貧者視  
田爲身外之妄得。天下必多荒田矣。

華陽范氏曰。自井田廢而貧富不均。後世未有能制  
民之產。使之養生送死而無憾者也。立法者未嘗不  
欲抑富而或益助之。不知富者所以能兼并。由貧者  
不能自立也。貧者不能自立。由上之賦歛重而力役  
繁也。爲國者必曰財用不足。故賦役不可以省。蓋亦  
反其本矣。昔哀公以年饑問于有若。有若對曰。盍徹  
乎。夫徹非所以裕用。然欲百姓與君皆足。必徹而後

可也。後之爲治者。三代之制。雖未能復。唯省其力役。薄其賦歛。務本抑末。尚儉去奢。占田有限。困窮有養。使貧者足以自立。而富者不得兼之。此均天下之本也。不然。雖有法令。徒文具而已。何益于治哉。

馮謙曰。貧者多由于苛政。固也。而亦由于無教。國多惰民。奢侈。雖人與之田。亦何益哉。

問橫渠謂世之病井田難行者。以亟奪富人之田爲辭。然處之有術。期以數年。不刑一人而可復。不審井議之行。于今果如何。朱子曰。講學時且恁講。若欲行。

之須有機會。經大亂之後。天下無人。田盡歸官。方可給與民。如唐口分世業。是從魏晉積亂之極。至元魏及北齊後周。乘此機。方做得。荀悅漢紀一段。正說此意。甚妙。若平世則誠爲難行。

按先儒稱夏后氏分田。每夫五十畝。以五畝上供。謂之貢。商人以六百三十畝之田。畫爲九區。八家皆私七十畝。共五百六十畝。各耕公田七畝。共五十六畝。以十四畝爲廬舍。謂之助。藉其力以助上。也。周人以九百畝爲井。內二十畝爲廬舍。家二畝。

半。餘八百八十畝。八家共耕。通力合作。及收斂之時。計畝均分。一家得百畝之所入。八家得九之八。公得九之一。謂之徹。徹者。通其財力。與斂之豐歉也。摛謙曰。先王之法。無不善。而行之非人。則無不有弊焉。貢則歲荒之時。民艱于常賦。助則末世民頑。厚私而薄公。徹則吏乘勢以下漁其民。上罔其君。出入會計之際。尤難稽考。故孟子雖言治地莫善于助。莫不善于貢。而後世卒不可行者。民與吏多奸也。貢法之不善。患在凶歲取盈。苟能論年之

上中下而取之。小荒蠲十之三。大荒蠲十之七。或盡蠲之。則仍無弊也。故貢助徹。猶之三正並建。而貢法寅正。永爲定制矣。○善通井田之變者。屯田也。漢武始用塞卒田邊地。自趙充國以屯田制勝。而言兵者祖焉。光武中興。遣將分屯。而魏武屯許下。鄧艾屯淮上。皆以克敵。唐有天下。遂設府兵屯田。三時務農。一時講武。居足以衛。動足以征。而無糜餉之害。有井田之遺意焉。至開元而廢。宋于唐汝河朔間。有田務。然屯利未廣。洪武初。則各省並

屯養兵百萬。不廢民間粒米。可謂盛矣。今欲復屯田。不必更循故迹。但有荒地。卽調兵屯之。立法之始。設良吏。定經界。度源流。通溝洫。分牛種。簡稼器。量人力。派田。其保恤賑救。一依井田之制。而畧變通之。雖時異勢變。而此一方可以數百年無壞。不必處處齊同也。○井田遂溝洫澮之制。諸儒推論立法如此。觀周禮有不易一易之地。有再易之地。有萊五十畝。有萊百畝。有萊二百畝。卽周制已不能盡然。正方。周徹法通公私爲一井。而雨我公田。



之詩。仍用助。想周制已不免貢助徹兼用。大抵地方極壞。必須從新彊理。則以我徹法行之。使以王國來極耳。其餘未弊者。且令仍舊。不必變也。推此法爲之。先王之治。亦可行于後代。但患無其人耳。○漢董子言于武帝曰。井田雖難卒行。宜少近古。限民名田。以贍不足。限田之法。始此。自晉及唐。亦嘗行之。今按限田。雖不可奪此與彼。然人一丁。田不得過百畝。亦均田之一術也。○唐陸贄言于德宗曰。京畿之內。每一畝。官租五升。而私家收租。殆

有畝至一石者。是三十倍于官稅也。降及中等。租猶半之。是十倍于官稅也。夫以土地王者之所有。耕稼農夫之所爲。而兼併之徒。居然受利。官取其一。私取其十。穡人安得足食。公廩安得廣儲。望令百官集議。凡所占者。約其條限。截減租價。務利農人。法貴必行。不在深刻。此乃安富恤窮之善經也。按私家租佃。雖非官所能裁。但官爲立法。終稍殺其暴。使兼併者無利。而又嚴荒田入官之禁。亦不均而均之一術也。○李愷爲魏文侯作盡地力之

教以爲地方百里。提封九萬頃。除山澤邑居參分去一。爲田六百萬畝。治田勤謹則畝益三斗。不勤則損亦如之。地方百里之增減。輒爲粟百八十萬石矣。此等處。儒者亦不可不知。

### 經界

朱子條奏經界狀曰。竊見經界一事。最爲民間莫大之利。其紹興年中。已推行處。至今圖籍有尚存者。則其田稅猶可稽考。貧富得實。訴訟不繁。公私之間。兩得其利。獨此泉漳汀州。不曾推行。細民業土產存其

苦固不勝言。而州縣坐失常賦。日朘月削。其勢亦將何所底止。然而此法之行。其利在于官府細民。而豪家大姓。猾吏姦民。皆所不便。故向來議臣屢請施行。輒爲浮言所阻。甚者至以汀州盜賊藉口。恐脅朝廷。殊不知往歲汀州累次賊盜。正以不曾經界。貧民失業。更被追擾。無所告訴。是以輕于從亂。其時初未嘗有經界之役也。以此相持。久無定論。不唯汀州之民。不能得其所欲。而泉州漳二州。亦復併爲所累。弊日益深。民日益困。論者惜之。今者議臣之請。且欲先行泉州。

漳二州而次及于臨汀。旣免一州盜賊過計之憂。又有以慰兩郡貧民延頸之望。誠不可易之良策也。臣雖多病。精力蚤衰。竊獨任其必可行也。然今已是仲秋。向去十月農隙之時。只有兩月之久。若蒙聖慈特許施行。則所有合行事件。欲乞便令監司州郡一面施行。若候得旨。方行奏請。更俟報可。竊恐遲緩不及。于事須至條畫。并此奏聞。今具下項。○一推行經界最急之務。在于推擇官吏。臣昨因本路諸司行下訊究。管兵已見申陳。欲乞朝廷先令監司一員。專主其

事使擇一郡守臣。汰其昏謬疲輒。力不任事。如臣等者。而使郡守察其屬縣令。或不能。則擇于其佐。又不能。則擇於它官。一州不足。則取于一路。見任不足。則取于得替待闕之中。皆委守臣踏逐申差。或權領縣事。或只以措置經界爲名。使之審思熟慮於其始。而委任責成于其終。事畢之後。量加旌賞。果得其人。則事克濟而民無擾矣。伏乞聖照。許賜施行。○一經畫之法。打量一事。最費功力。而紐折筭計之法。又人所難曉者。本州自聞初降指揮。卽已差人于鄰近州縣。

已行經界去處。取會到紹興年中施行事目。及募本州舊來有曾經奉行諸曉筭法之人。選擇官吏。將來可委者。日逐講究。聽候指揮。但紹興年中。戶部行下打量撥筭格式印本。多方尋訪。未見全文。竊恐諸州亦未必有。欲乞聖慈。特詔戶部根檢。略錄點對行下。○一圖帳之法。始于一保。大則山川道路。小則人戶田宅。必要東西相連。南北相照。以至頃畝之濶狹。水土之高低。亦須當衆共定。各得其實。其十保各爲一都。則其圖帳。但取山水之連接。與逐保之大界總數。

而已。不必更開人戶田宅之濶狹高下也。其諸郡合  
爲一縣。則其圖帳亦如保之於都而已。不必更爲諸  
保之別也。如此則其圖帳之費亦當少減。然猶竊慮  
今日民力困弊。又非紹興年中之比。此費雖微。亦恐  
難以陪備。若蒙朝廷矜憐三郡之民。不忍使之更有  
煩費。則募若令役戶。只作草圖草帳。而官爲置紙僱  
工。以造正圖正帳。專委守倅。及所差官會計買紙僱  
工之費。實用若干錢物。具申漕憲兩司。許就本州所  
管兩司上供錢內截撥應副。如此則大利可成。而民



亦不至于甚病矣。又據龍巖縣尉劉璧申。經界之行。唯里之正長。其役最爲繁重。疆理畝畝。分別土色。均攤稅賦。其在當時。動經再歲。彼出入阡陌。妨廢家務。固已不勝其勞。一有廣狹失度。肥磽失宜。輕重失當。則詞訴並興。而督責又隨至矣。然有產則有役。適當重難。使出心力。以應役使。亦無可奈何。然彼皆鄉民。安知經界書筭。則必召募書人。以代此役。而書人能書筭。必嘗爲胥吏之傑黠者。莫不乘時。要求高價。執役之人。急于期限。不免隨索則酬。而又簿書圖帳。所

用紙札亦復不貲。執役之人安能勝此勞役。竊謂經界之在今日不可不行。行之亦不患無成。若里正里長書人紙札之費。有以處之。則可舉行。若坐視其殫力耗財如曩日。恐非仁政之意也。臣竊詳此意。與臣所奏六指畧同。而所陳利害更爲詳盡。伏乞參照。特許施行。○一紹興經界。打量旣畢。隨畝均產。而其產錢不許過鄉。此蓋以筭數太廣。難以均敷。而防其或有走弄失陷之弊也。若使諸鄉產錢租額素來均平。則此法善矣。若逐鄉產錢租額本來已有輕重。卽是

使人戶徒然遭此一番打量攢筭之擾而未足以革其本來輕重不均之弊。無乃徒爲煩擾而不免有害多利少之歎乎。今來推行經界。乃是非常之舉。不可專守常法。欲乞特許產錢過鄉。通縣均紐。庶幾百里之內。輕重齊同。實爲利便。伏乞聖照。特詔施行。○一本州民間田。有產田。有官田。有職田。有學田。有常平租課田。名色不一。而其所納租稅輕重亦各不同。政使坐落分明。簿書齊整。尚難稽考。何況年來產田之稅。旣已不均。而諸色之田。散漫參錯。尤難檢計。姦民

猾吏並緣爲姦實佃者或申逃開無田者反遭俵寄  
至於職田俵寄不足則或撥別色官錢以充之如此  
之類其弊不可徧舉今來欲行經界若更存留此等  
名字則其有無高下仍舊不均而名色猥多不三數  
年又須生弊爲今之計莫若將見在田土打量步畝  
一槩均產每田一畝隨九等高下定計產錢幾文而  
總合一州諸色租稅錢米之數却以產錢爲母別定  
等則一例均敷每產一文納米若干錢若干去州縣  
遠處遞  
減今米只一倉受納錢亦一庫交收却以到官之數

照元分數分隸若干爲省計。若干爲職田。若干爲學糧。若干爲常平。逐旋撥入諸色倉庫。除逐年二稅造簿之外。每遇辰戌丑未之年。逐縣更令諸鄉各造一簿。〔原註〕今子午卯酉年應辦大禮寅申巳亥年解發舉人。惟此四年州縣無事。開具本鄉所管田數四至步畝等第。各註某人管業。有典賣則云元係某人管業。某年典賣。某人見今管業。却於後項通結逐一開具某人田若干畝。產錢若干。使其首尾互相照應。又造合縣都簿一扇。類聚諸簿。通結逐戶田若干畝。產錢若干文。其有田業散在諸鄉者。則

併就烟爨地分。開排總結。並隨秋料稅簿。送州印押。下縣。知佐通行收掌。人戶遇有交易。卽將契書。及兩家砧基。照鄉縣簿。對行批鑒。則版圖一定。而民業有經矣。但或者尚疑如此。則本州產田納稅本輕。而今當反重。官田納租本重。而今當反輕。施行之後。爭競必多。須俟打量了畢。灼見多寡實數。方可定議。其說似亦有理。伏乞聖照。并與行下。俟一面打量了畢。別具利害。申奏聞次。○一本州更有荒廢寺院田產頗多。目今並無僧行住持。田土爲人侵占。逐年失陷稅

賦不少。將來打量之時。無人照對。亦恐別生奸弊。加以數年。將遂不可稽考。欲乞特降指揮。許令本州出榜召人實封請買。不唯一時田業有歸。民益富實。亦免向後官司稅賦。因循失陷。而又合于韓愈所謂人其人。廬其居之遺意。誠厚下足民。攘斥異教。不可失之機會也。伏乞聖照。特許施行。○第四項。貼黃曰。臣契勘產錢不得過鄉。此平世之常法也。然此法之來。亦甚未久。向來未立此法之時。產錢往往過鄉。割上烟爨去處。故州城縣郭所在之鄉。其產無不甚重。與

窮山僻壤。至有相倍蓰者。此逐鄉產錢租額。所以本  
來已有輕重之所由也。○第五項貼黃曰。所謂儀寄  
者。正田不知下落。官司恐失租米。卽以其租分儀寄  
搭鄰近人戶。責令送納。推此一端。貧民受弊。亦可見  
矣。然他處不聞有此名字。獨漳州見之。○申諸司狀  
曰。紹興年中。福建一路。但泉州汀州。不曾經界。然亦  
非全然不行也。是其打量攢造。蓋已十八九成。而提  
刑孫汝翼。以爲山賊未平。民散田荒。慮有不實。亟奏  
罷之。本非此三州者。偏有不可經界之勢也。且其至



今歲月益久。流亡復業。田土開墾。又已非復昔時矣。  
○又曰。熹頃在同安。嘗見惠安縣丞鄭貽叔。自言知  
仙遊縣日。適值朝廷推行經界。初得戶部行下事目。  
讀之茫然。不曉所謂。而寮佐吏史。亟請施行。因竊自  
念。已猶未曉。何以使人。乃閉閣謝事。覃思旬日。然後  
通曉。心口反復。更相詰難。胸中洞然。無復疑滯。然後  
集諸同官。而告語之。使其有疑。卽以相問。如是數日。  
而同官亦無不曉者。同官旣曉。然後定差。保正保長。  
闔縣通差。不以烟爨遠近爲拘。不以歇役新舊爲限。

但取從上丁產高人。分爲二等。大者以備都副保正。小者以備大保長。各以紙籤書其姓名。分置兩貼。又於二貼。各分四類。或物力高彊。或人丁衆盛。或才智足任謀畫。或筋力可備奔走。各以其類。置于一貼。凡選一都一保。則必兼取此四色人。使之同事。令其各出所長。以相協濟。于是人皆悅從。相率就事。差役旣定。然後以戶部事目印本給之。又爲說其大意。使之退而講究。期以一日。悉集縣廷。凡有所疑。悉其請問。悉以已意詳爲解說。力疲氣乏。則請同官更番應之。

如是五六日。凡爲保正長者。亦無不悉曉其法。然後散遣打量。不過兩月。它邑差役未定。而仙遊打量見次第矣。熹嘗竊記其言。以爲若使被差之官。人人如鄭君之用心。則雖歲歲方田。年年經界。亦無害于民者。○又曰。此一事。自初降旨。今幾半歲。若欲決意舉行。則須及此七八月間。晝降指揮。檢照紹興年間戶部所行事目。雕印行下。令逐州縣前期講究。隨宜損益。舉辟官吏。取撥錢物。差下保正副長。要使秋成之後。卽便打量。東作之前。次第了畢。庶幾乘此農隙。可

以集事。今來已是夏末秋初。而都未見有此消息。文字往來。泛然而已。正使幸而不至寢罷。亦須明年秋冬方得下手。是則不惟虛費時月。使三州疲悴之民。更受一年之苦。而上下官吏。必將妄疑諸司。無意主張。不肯着力詢究。兼是事未施行。利害曲折。亦非常情所能預料。雖欲詢究。其道無由。適所以漏洩幾事。使營私避事之人。得以陰笑竊議于其後。非計之得也。○又回申轉運司。乞候冬季打量狀曰。自去年二月。準使司牒。條具經界利便。於六月恭奉聖旨。令嘉

相度聞奏。當已節次具狀申奏去訖。仍累行下屬縣曉諭士民。各據陳述利便紐筭方法。仍會到福州興化軍諸縣。紹興十八年舉行經界案祖。逐項斟酌。取其簡便易行。將來不至煩擾者。分明曉諭。并將田形筭法。鏤版行下四縣。先令人吏習學。指教民戶。務要人人通曉。其它節目亦皆稍有倫緒。只是差保正副長分畫都界。置立土封之類。以未得旨。不敢預先行。今來伏準使牒。備坐省劄。恭奉聖旨指揮。先將本州措置施行。熹聞命驚喜。卽欲奉行。旣而思之。方量

之役全在田野。其所使令保正副長。喚集照應書押人戶。又是產稅耕農之家。所以紹興間。舉行此法。必在十月以後。正以不欲奪其農時。務欲公私兩便。今雖方是正月中旬。然閩南地暖。墾下田土。纔及冬春之交。民間已自耕犁。若于此時施行。不唯有妨農務。而春月雨水常多。原野泥濘。恐亦難得應期了畢。曠日持久。勞費倍多。將使無知之民。不見朝廷之良法。美意而反以爲厲已。豪家大姓。隱瞞租稅之人。本所不悅。又得以此藉口。肆爲扇惑動搖之計。凡此曲折。

實有未便。以是反有遲疑。未敢遽然下手。又竊惟念此事之行。雖非熹所建白。然節次條陳利害。熹實在其可行。致蒙諸司特賜保明。朝廷俯從所請。至于異議紛紜。久而不決。又蒙聖明果斷。特許行之一州。德意所加。至深至厚。豈可不亟奉行。更有前卻。則又且欲及此農務尚寬之際。先次差下保正副長。便令打量城市山坂。至春深而權罷。俟秋晚復行。旣又深念如此施行。旣行復止。中間半歲。機緘泄露。人情玩習。其弊且將無所不有。是以不敢復顧避。下之嫌。而極

論其未可遽行之說如此。欲望使司詳酌其宜。特賜敷奏。畧倣紹興十八年事體。許俟七月一日。方行差役。十月一日。然後打量。其他分畫都界。置立土封之類。卽容本州日下一面措置。以至秋成之後。規畫當益詳盡。吏民當益諳熟。雖遲之數月。而百年久遠一定之規。可以優游而責成。不至趣迫而害事。○漳州經界卒以進士吳禹圭言報罷。先生自劾去。○答黃子耕書曰。向在臨漳。訪問丈量算法。得書數種。然鄉民卒乍。不能通曉。反成費力。後得一法。只于田段中。



間先取正方步數。却計其外尖斜屈曲處。約湊成方。却自省事。恨爲私意浮議所搖。不得盡力其間。以見均田平賦之効。今讀所示。尤使人悵然也。○答王子合書曰。經界一事。固知不能無小擾。蓋驅田里之民。使之隨官荷畚持鍤。揭竿引繩。以奔走于山林田畝之間。豈若其杜門安坐。飽食而嬉之爲逸哉。但以爲若不爲此。則貧民受害。無有已時。故忍而爲之。庶其一勞而永逸耳。若一一恤此。必待其人人情愿而後行之。則無時而可行矣。且如此事。紹興年間。正施行。

時人人嗟怨。如在湯火之中。是時罔目見之。亦以爲非所當行。但烹事之後。田稅均齊。里閭安靖。公私皆享其利。遂無一人以爲非者。凡事亦要其久遠如何耳。但惜乎此事未及下手。而上下共以私意壞之。使人預憂其擾而不見其利。此則非烹之罪。而當世自有任其責者。尚何言哉。然當時若更施行。則其擾不但土封而已。不知噂沓又復如何也。

按王介甫方田法。以東西南北各千步。當四十一頃六十六畝一百六十步爲一方。若瘠鹵不毛。及

衆所食利。山林陂塘路溝墳墓。皆不立稅。凡田方之角。立土爲埧。植其野之所宜木。以封表之。所謂土封卽此歟。紹興間李椿年言經界不正有十害。經界正爲十利。秦檜主之。命措置經界。唯淮東西京西湖北四路被邊。姑仍舊。漳汀泉未畢行。瓊州及瀘叙等州並免。及朱子知漳州。又有此議。終尼不行。後湖南廣西再命再辭。及上留丞相書。深以此爲恨。

隆慶間吾杭丈量不均。委嘉興府同知黃清覆定。仁和經界有丈量法則六條。○一專責委以本官。

原係嘉興之官。民非所事。浮言易起。必須上人專  
于委任。而該縣知縣協力贊襄。視本官所任之事。  
原爲代已之勞。視本官所成之功。不啻若自己出。  
庶始終無僨事之虞。其分委官四員。該府開送。○  
一選人役。該縣選各里中丁糧數多。行止端莊者  
一人。爲公正富民。使領一里丈量之事。卽令保舉  
量手。筭手。書手各一名。要素有身家。勤慎守法之  
人。不許容積年奸猾之人。營充作弊。若本里書筭  
量手有奸。公正富民不察者。連坐。如果奉公守法。  
官府覆量無違。五年之內。給帖免役。○揭謙按富  
人子多。不知筭。若行此法。必須能知筭法者。方可  
責成。不能須令退役。庶無枉濫。○一准首正。凡有  
欺隱田糧。盡從宥免。如仍前欺隱。覆丈之時。爲他  
人出首者。通行究治。○一定經界。凡丈量不清。皆  
由隔縣田地。彼此影射。今取鄰縣圖冊查明。于縣  
界田塋壘土地。立木爲標。詳書業主。與某縣某區某  
畝某圩某人田界連。以便查覆。○一較弓式。每田  
一畝。積弓計二百四十。每一弓長鈔尺六尺。此一

定制也。即便較定弓式。各里一張。送官印烙。給發業戶。使先自量戶下之田。每丘填給號票一張。木牌一面。備開田形四至。量過弓數于上。原額稅糧若干。今次量多量少若干。木牌各插田內。以聽覆量。辨驗號票。類集交與本里公正。約同本區老圩長里書人等。重量無差。投送分管縣佐。再量的實。然後類送總理同知黃清。監督復量。弓步不差。田畝無隱。方准收票在官。彙集成冊。候量完之日。照畝定稅。仍依式各填紙一張。用半號關防。給業戶為照。如朋奸隱漏。通行究贓正法。○揭謙按此尺宜依律較定。使天下齊同。○一查區總夫經界既正。則各區總數。分之即為各戶撒數。中間幾區。或以河岸。或以道路為限。雖鱗次栉比。未易辨識。而每區大段。亦自分明。監理分委縣佐等官。總量一區弓數。內除溝洫道路若干。即是各里公正業主所量之總數。如有不符。即係隱漏。而大綱無遁矣。經界了畢。監理同知。即將耑冊。盡地繪圖。重造一部。申報省府。○按此法。宜合朱子經界疏狀參觀。

## 賦役

賁與馬氏曰。自秦廢井田之制。隳什一之法。在民所耕。不計多少。於是始舍地而稅人。征賦二十倍于古。漢高祖始輕田租。十五而稅一。其後遂至三十而稅一。皆是度田而稅。然漢時亦有稅人之法。按高祖四年。初爲筭賦。人百二十爲一筭。七歲至十五。出口賦。人錢二十。此每歲所出也。然至文帝時。卽令丁男三歲而二事。賦四十。則是筭賦減其三分之一。且三歲方徵一次。則成丁者。一歲所賦。不過十三錢有奇。其賦

甚輕。至昭宣帝以後。又時有減免。蓋漢時官未嘗有授田限田之法。是以豪強田連阡陌。而貧弱無置錫之地。故田稅隨占田多寡。爲之厚薄。而人稅則無分貧富。然所稅每歲不過十三錢有奇耳。至魏武初平。袁紹乃令田每畝輸粟四升。又每戶輸絹二匹。綿二斤。則戶口之賦始重矣。晉武帝又增而爲絹三匹。綿二斤。其賦益重。然晉制男子一人占田七十畝。女子及丁男丁女占田皆有差。則出此戶賦者亦皆有田之人。非鑿空而稅之。宜其重于漢也。自是相承。戶稅

皆重。然至元魏而均田之法大行。齊周隋唐因之。賦稅沿革。微有不同。然大槩計畝而稅之。令少計戶而稅之。令多。蓋其時戶戶授田。則雖不必履畝論稅。而逐戶賦之。則田稅在其中矣。至唐始分爲租庸調。田則出粟稻爲租。身與戶則出絹布綾綿諸物爲庸調。然口分世業。每人爲田一頃。則亦不殊。元魏以來之法。而所爲租庸調者。皆此受田一頃之人所出也。中葉以後。法制隳弛。田畝之在人者。不能禁其賣易。官授田之法盡廢。則向之所謂輸庸調者。多無田之人。



矣。乃欲按籍而徵之。令其與豪富兼并者一例出賦。可乎。又况遭安史之亂。丁口流離轉徙。版籍徒有空文。豈可按以爲額。蓋當大亂之後。人口死徙虛耗。非復承平之舊。其不可轉移失陷者。獨田畝耳。然則視大曆十四年墾田之數。以定兩稅之法。雖非經國之遠圖。乃救弊之良法也。德宗時楊炎變租庸調爲兩稅。視大曆十四年墾田之數。以定。但立法之初。不任土所宜。輸其所有。乃計絹帛而輸錢。既而物價愈下。所納愈多。遂至輸一者過二。重爲民困。此乃掊克之吏所爲。非法之不善也。賦稅

必視田畝。乃古今不可易之法。三代之貢助徹亦只視田而賦之。未嘗別有戶口之賦。蓋雖授人以田。而未嘗戶賦之者。三代也。不授人以田。而輕其戶賦者。兩漢也。因授田之名。而重其戶賦。則自魏至唐。賦之重者。已不可復輕。遂至重爲民病。則自魏至唐之中葉是也。自兩稅之法行。而此弊革矣。豈可以出于楊炎而少之乎。

楊謙曰。今之法雖承兩稅。然楊炎之法。謂人無丁中。以貧富爲差。陸宣公謂其計估筭緡。失平長僞。

挾輕資轉徙者脫徭役敦本業不遷者困歛求乃  
誘之爲姦毆之避役今則丁錢不論貧富爲是但  
不當責錢銀于田畝耳○據洪武三年詔戶部籍  
天下戶口置戶帖戶各具其姓名年歲貫址夫家  
之數爲帖已著之籍編勘合州縣用半印鈐記籍  
公府而帖給之民令有司以時清覈歲郊祀中書  
省以戶籍陳壇下薦之天祭畢而藏之十四年詔  
天下府州縣編賦役黃冊以一百一十戶爲里推  
丁糧多者十戶爲長餘百戶爲十甲甲十戶名全

圖。其不能十戶。或四五戶。若六七戶。名半圖。城中曰坊。近城曰廂。鄉都曰里。里各編一冊。冊首爲總圖。鰥寡孤獨。不任役者。則繫于百一十戶之外。著之圖尾。曰畸零帶管。冊成。上戶部。而省府州若縣各存其一。以待會比。及十年。有司將定式。給坊廂里長。令人戶諸丁口。田塘山地畜產。悉各以其實自占。上之縣。縣官吏查比先年冊。諸丁口登下其死生。其事產田塘山地貿易者。一開除。一新收。過割其糧稅。其排年坊里長消乏者。于百十戶內。遴

丁糧近上者補之。有事故戶絕者。附畸零。而官吏里甲敢有團局造冊。科歛害民。及人戶自占以實。故阻抑不攢造者。以差次科罪。其欺隱影射。飛灑詭寄者。罪如科。其菴院寺觀僧道。已給度有田。具編冊如民科。戶三等曰民。曰軍。曰匠。丁二等曰成丁。曰不成丁。冊既具。州縣正官躬親磨筭。訖類編填圖。署銜名上之府。府提調正官磨勘亦如之。上之省司。省司使如法上之部。年終進呈。送南京後湖收架。歲委監察御史二人。戶部給事中一人。督

監生清比達悞。檢暴蠹浥。洪武二十年。遣國子生  
武淳等。隨所在稅糧多寡。定爲九區。區設糧長四  
人。集耆民履畝丈量。圖其田之方圓曲直。善惡廣  
狹。若丈尺。書主名及田四至。如魚鱗相比次。彙爲  
冊。謂之魚鱗圖。冊成上之。蓋太祖以天下之賢士  
大夫。隸之仕籍。以統郡縣之人民。而郡縣之人民。  
則具于其鄉之黃冊。以天下之郡縣。悉圖載于一  
統志。而郡縣之土地。則又悉圖載于其縣之魚鱗  
圖。甚大畧也。瀛海張氏曰。圖所重在田。則田爲經。

人爲緯。田各歸其都圖。諸原隰墳衍腴瘠方圓之形畢具。遇土田之訟則質之。此不與人爲轉移者也。冊所重在戶。則人爲經。田爲緯。田各歸其戶。一切新舊變遷離居析爨之故。皆具。遇賦役之徵則稽之。此與人爲轉移者也。有轉移者以時其登下之數。則役不膠于一。定而消長之變均。有不轉移者。以握其常定之券。則田不紛于出入。而隱漏之弊絕。法至詳矣。顧有司定賦役。利于冊之便。則田必隨人。田旣隨人。則卽去其在所。而與圖不合。寢

久則圖不足據。一聽冊之轉。而欺隱影射飛洒。詭寄之姦百出。此皆經界不正之故。經界者。非獨古井田有經界。卽邑分爲鄉。鄉分爲都。都分爲圖。必有經界焉。其田必有定數焉。受田之人。甲與乙。易覈也。受役之數。重與輕。易裁也。輕重之額。定。甲乙之名立。戶有入。田必無出。人可來。役必不可往。如此。則豪民疲于奔命。必約而定于一方。而單戶窮于分析。將各而守其隴畝。不井田而民安于鄉井。不限田而民甘于節制矣。○正嘉以後。魚鱗冊。



歲久漫漶。至亡失不可問。而田糧始得過都圖賦役冊。獨以田從戶。其巨室置賣田產。遇造冊。賄里書。有飛洒見在人戶者。有暗藏逃絕戶納者。有花分子戶不落眼者。有留在賣戶全不過割者。有過割一二石爲包納者。有全過割不歸本戶者。有有推無收。有總無撮。名爲懸掛。掬回者。有暗襲京官方面進士舉人脚色。捏作寄庄者。于是邇年派糧差多無所歸。俱命小戶賠償。小戶逃絕。命里長里長逃絕。命糧長。糧長賠累。亦皆歸于逃絕。乃藉藉

議丈量而鄒文莊守益行之其鄉吉安府安福縣  
知州安如山行之裕州而萬曆八年遂大均天下  
之田。然其吏之清強敏練撫字忠愛者得因自效  
而其罷軟貪縱養交賈譽者不無反增其弊。祭酒  
王材嘆曰。經界盛事數百年一逢。而有司無真切  
爲民之心。祇欲速成。以邀虛譽。是聖祖之尺度不  
足遵。上司之簡書不足畏。獨書筭以省力之私。爲  
一則之說。逢之官昧其良心以欺民。民抑其本心  
以徇官。取快一時操切之謀。無復異日經久之慮。

則是舉之行固不如無舉之愈也。嗚呼。書稱成賦。必則三壤。禮制地征。必辦五物。禹任土作貢。至十有三載。乃同。今皆違之。能有行乎。搗謙曰。開國之初。法嚴令必。人主有知人之明。專委公廉有才者。分歷天下。而下人畏誅。故經界之正。大抵少弊。至中葉以後。人多玩法。而請托之弊多。又各委長吏行之。長吏之賢不肖。地各不同。則其利弊亦州各不同。其勢然也。○魚鱗冊始于宋之趙譽夫。其法與王介甫方田法不甚相遠。然洪武中。以此定經

界而介甫之法爲弊于宋者。蓋其時衆君子不肯行其法。而介甫用小人行之。故徒法不能以自行也。○撫謙嘗問賦役于玄宥祝先生。先生曰。一方有一方之賦役。一時有一時之賦役。如今之田。或以一斗起科。有好田收三石。便爲三十稅一。薄田收七八斗。便爲什二三。或反賠糧。此時有人種。便爲好田。數年佃人弛荒。便爲荒田矣。○定稅之法。當隨五土與五色。參肥瘠旱澇。分爲數等。年有豐有凶。有平。以平年爲準。什稅其一。遇荒則或減或

獨地形明載圖籍。每年令縣令按行水道。有海墾河決。人力不可回。許奏改稅糧。從實增減。其餘蕪塞。府縣不爲開通。卽爲不職。荒蕪田地。貧者補而富者罰。其可也。○平世必使其令信如四時。孔子寧去食而不可去信者。正爲餉之不可加也。觀自來吏之作姦。皆由于每歲加減不等。與歛法名目不同。併官所派存留起運該納之科。歲各有異。故小民任姦胥里甲之高下。莫可致詰。今若歷年久遠。無分釐加派。凡所有常稅。令長吏作爲定書。四

時讀法。每鄉宣布之。吏胥雖欲侵欺乾沒。何所措手。○按計畝。稅必歸本里。則無產去役存之弊。併無遠方兼并之事。而或以爲人戶住所分散。則里甲之催徵賦稅誠難。不知今之人戶流徙。已與黃冊之版籍異。而亦未嘗不徵。若分主客戶。在本里者爲主。令同里自催。在他里者爲客。着一役催徵。此亦抑并兼之一法也。但催徵之役。不許包納。而厲其禁。庶幾無弊。○元時定稅。議者以爲太輕。耶律楚材曰。作法于涼。其弊猶貪。後將有以利進。

者。則今已重矣。○人丁宜逐年增減。而往往隱漏者。縣官不肯減。人戶不肯增。上下不以誠而已。苟上之人以誠化民。則民自不隱。○聖賢論賦稅多矣。只歛從其薄而已。蠲租免稅。盛事也。然亦有弊焉。貧民田止數畝。其稅不敢不完。富而頑者。田連阡陌。關通猾吏。積年拖欠。遇赦買免。然則蠲稅適以召奸耳。善蠲者當分爲二科。其不欠者。竟蠲本年之稅。其欠者。則蠲其本年。而徐征其欠。察其作奸者。重懲之可也。○唐陸宣公言攤賠之害曰。田

疇荒蕪戶口減耗。牧守苟避于嚴責。罕盡申聞。所  
司姑務于取求。莫肯矜恤。遂于逃死闕額。累加見  
在疲氓。一室已空。四鄰咸盡。又言催徵之害曰。蠶  
事方興。已輸縑稅。農功未艾。遽歛穀租。上司之繩  
責既嚴。下吏之威暴愈促。有者急賣而耗其半直。  
無者求假而費其倍酬。所係遲速之間。不過旬月  
之異。一寬稅限。歲歲相承。遲無所妨。速不爲益。何  
急敦迫。重傷疲人。此爲民父母者所當知也。○玄  
宥先生又曰。朝廷錢糧。所以積欠乾沒者。多由催



徵者急。則吏人以他樣錢糧。那蓋縣官但以錢糧  
蚤完。得行考滿。則不復顧前後之事。而但顧目前。  
那移。故其中以民之脂膏。飽吏胥者多矣。○古人  
司徒掌邦教。今掌邦斂。攷世之變。可知也。○周公  
宗建。令仁和長。單催稅之法。里人至今稱之。○漢  
文以官爵募民入粟。而蠲天下田租。夫當取而蠲  
之。是違道干譽也。以粟得官。是教民以無耻也。均  
失之矣。先王非荒不蠲。非德不官。

康侯胡氏曰。春秋凡用民必書其所興作。不時害義。

固爲罪矣。雖時且義亦書。見勞民爲重事也。

撝謙曰。里役有銀差力差之別。夫庶人力役。義也。銀差則取之何名。如有公費。自當于常稅內留一分以充之。未有可妄取百姓者。如宋破分之法可也。○或問雇役差役之宜。曰。子言子產有君子之道。四曰其使民也。義使民者。聖王之所不免。亦曰義而已矣。周禮役民。國中貴者。賢者。能者。服公事者。老者。疾者。皆舍。不聞富者之舍也。今使民出錢而免役。僱貧者役之。是賣富而差貧也。姦胥犯此。

則朝廷罪之。豈有天子而賣富差貧者哉。其使民也。亦不義矣。富者有錢。自僱人代役。則可。上之人立爲此法。則不可。宋之王安石主僱役。司馬光主差役。當時議者但欲便民。而不論先王立法之意。是以紛紛不能定也。以利害論之。唐以租庸調三者取民。所謂庸者。卽力役也。用民之力。歲二十日。閏加二日。不役者爲絹三匹。謂之庸。至楊炎變租庸調爲兩稅。于時詔書謂兩稅之外。悉無他徭。是則免役之法。不待王安石而已行之矣。然其後宣

宗大中九年。詔以州縣差役不均。自今每縣據人貧富及役之輕重。作差役簿。送刺史簡署訖。鑰于令廳。每有役事。委令據簿輪考。則差役猶不免也。至宋之賦。猶唐之兩稅也。故庸則以廂軍爲之。而所謂衙前諸役。非古三日之役也。王安石欲行免役錢。而蘇軾曰。自唐楊炎廢租庸調。以爲兩稅。則是租調與庸。兩稅旣兼之矣。今兩稅如故。奈何復欲取庸。非事例也。然其言曰。聖人立法。必慮後世。豈可于常稅之外。生出科名哉。萬一不幸。後世有

多欲之君。輔之以聚斂之臣。庸錢不除。差役仍舊。使天下怨毒。推所自來。則必有任其咎者矣。此言是也。乃其後軾反自忘其言。而又以力爭于元祐之際。至南渡以後。役錢畢輸。而若役果如故。金華民汪灌等以私田棄佐當役。又有義役之舉焉。噫。可嘆哉。洪武中以田起糧。以戶起役。而役之重者。歸于上中戶。法固善也。至中年役重。民病。乃議行一條鞭法。通府州縣十歲中夏稅秋糧存留起運額若干。均徭里甲土貢雇募加銀額若干。通爲一

條總徵而均支之。其徵收不輸甲。通一縣丁糧均  
派之。而下帖于民。備載十歲所應納之數于帖。而  
歲分六限納之官。其起運完輸若給。皆官府自支  
撥。則猶唐之變兩稅。宋之變免役也。其法始下。民  
大便之矣。不數十年。而差役之苦。更甚于往時。竟  
何益哉。以此知官之與民。必不能無役者也。役重  
民病。但有恤民減役而除貪殘之吏。卽有所費。但  
當請節之于上。不容更取之于下。徵之往事。固如  
此矣。○洪武中役法。依戶數定里長。不許那移。然

卷之六

三

其重役止派上中戶而不限里。十八年令有司第  
民戶上中下三等爲賦役冊貯於廳事。凡遇徭役  
取驗以革吏弊。然民有丁產多而貧丁產少而富  
者極難清查。明道令晉城預知民間貧富丁產之  
數乃審繇役按籍而定之無敢違者。非至誠用人  
不能得之。○富民者國之所恃以安也。重役加于  
富者不過曰苛矣。富人哀此筑獨耳。究之富者病  
國亦病矣。安民唯有減役。別無巧法。○軍興則役  
自繁。興師至萬而民無妄役可謂整矣。○役莫

大于漕運。久必民不堪命。若軍運。則非重督運之權。假以生殺。不可也。○古之役民甚繁。然而君民相親。如家人父子。出力而不奪其時。不傷其財。不致其病。故雖繁。可任也。後世官之治民。如傳舍田疇。荒矣而不恤。貨財殫矣而不知。筋力瘁矣而不知。牛半用人。雖歲一役。而民不堪也。

### 理財

盱江李氏曰。古人有言曰。穀甚賤。則傷農。貴則傷末。爲農常糶。而末常糶也。此一切之論也。愚以爲賤則



傷農貴亦傷農。賤則利末。貴亦利末。蓋農不常糶。有時而糶也。末不常糶。有時而糶也。以一歲之中論之。大抵歛時多賤。而種時多貴矣。夫農勞于作。劇于病也。愛其穀。甚于生也。不得已而糶者。則有由焉。小則具服器。大則營昏喪。公有賦役之令。私有稱貸之責。故一穀始熟。腰鎌才解。而日輸于市焉。糶者既多。其價不得不賤。賤則賈人乘勢而罔之。輕其幣而大其量。不然不售矣。故曰。歛時多賤。賤則傷農而利末也。農人倉廩既不盈。寶窖既不實。多或數月。少或旬時。

而用度竭矣。土將生而或無種也。耒將執而或無食也。于是乎日取於市焉。糴者既多。其價不得不貴。貴則賈人乘勢而閉之。重其幣而小其量。不然。則不予矣。故曰種時多貴。貴亦傷農而利末也。農之糴也。或闔項而收。連車而出。不能以足用。及其糴也。或倍稱賤賣。毀室伐樹。不能以足食。而坐賈常規人之餘。幸人之不足。所爲甚逸。而所得甚饒。此農所以困窮而末所以兼恣也。易繫辭曰。何以聚人曰財。理財正辭。禁民爲非曰義。財者君之所理也。君不理。則蓄賈專。

行而制民命矣。上之澤。于是不下流而民無聊矣。此平糴之法。有爲而作也。管仲行于齊。李悝行于魏。耿壽昌行于漢。國不失實。人獲其利。自晉及隋。時或興廢。厥聞未昭。唐天寶中。天下平糴。殆五百萬斛。茲全盛之事也。大宋受命。將百年矣。穀入之藏。所在山積。平糴之法。行之久矣。蓋平糴之法行。則農人秋糴不甚賤。春糴不甚貴。大賈蓄家。不得豪奪之矣。而官之出息。當什一二。民既不困。國且有利。茲古聖賢之用心也。然其所未至。則有三焉。數少也。道遠也。吏奸也。

一郡之糴不數千萬。其餘畢入于買人。至春出糴。寡出之。則不足于饑也。多出之。則計日而盡也。于是買人深藏而待其盡。盡則權歸于買人矣。是數少之弊也。倉儲之建。皆在郡治。縣之遠者。或數百里。其貧民多糴。則無資。少糴。則非可朝行而暮歸也。故終弗得而食之矣。是道遠之弊也。舉掌之人。政或以賄。槩量不均。行濫時有。及其出也。或減焉。或雜焉。名曰裁價。實則貴矣。是吏奸之弊也。今若廣置本泉。增其糴數。則蓄賈無所專利矣。倉儲之建。各于其縣。則遠民可

以得食矣。申命州部。必使廉能。則奸吏無以侵刻矣。如此利國便人事。可經久。是謂通輕重之權。不可不察。

朱子曰。夫先王之世。使民三年耕者。必有一年之蓄。故積之三十年。則有十年之蓄。而民不病于凶饑。此可謂萬世之良法矣。其次則漢之所謂常平者。其法亦未嘗不善也。

摠謙曰。常平之法。宜自三石以上。不許兼糴。亦所以防蓄賈也。

右論平糴

謝顯道曰。有議增解鹽之直者。伊川曰。價平則鹽易賤。人人得食。無積而不售者。歲入必倍矣。增價則反是。已而果然。

馮謙曰。鹽法非王道也。然後世以代正供。似不可廢矣。通商惠民。禁奸三者爲上。裕國次之。○鹽大利之所在也。而法得行者。官執法而賄不行也。世亂賄行。何法不弊。竊嘗聞之商人。今日之鹽。行私者衆。苟守正法。不唯無利。抑且虧本。然則不業鹽。

則已。業鹽必冒法矣。爲國家者。豈可使民必冒法而爲商哉。

### 右論鹽法

謝顯道曰。陝右錢以鉄舊矣。有議更以銅者。已而會所鑄子不踰母。謂無利也。乃止。伊川聞之曰。此乃國家之大利也。利多費省。私鑄者衆。費多利少。盜鑄者息。民不敢盜鑄。則權歸公上。非國家之大利乎。

朱子曰。古者荒歲方鑄錢。周禮所謂國凶荒札喪。則市無征而作布。旣可。因此以養饑民。又可以權物之

重輕。蓋古人錢闕。方鑄錢以益之。

撝謙曰。王者鑄錢。非以侔利也。所以平民心也。錢行則僞銀息。分釐之間。輕重畫一。而民心平。少時聞訓。謂分釐用銀。不妨過重。以惠小販。長而食貧。見小販之等。于定星處。率重半分。積而論之。貧者零用銀一兩五錢。只抵一兩。富者併用。則反是。乃悟向之所謂善者。正所謂惡也。以此知天下之善。莫過于平。此亦錢不行之故。

右論錢法



龜山楊氏曰。周官泉府之官。以市之征布。歛市之不售。貨之滯于民用。以其價買之。物揭而書之。以待不時而買者。夫物貨之有無。民用之贏乏。常相因而至也。不售者有以歛之。蓋將使行者無滯貨。非以其賤故買之也。不時買者有以待之。蓋將使居者無乏用。非以其貴故賣之。蓋所以阜通貨賄也。此商賈所以願藏于王之市。而有無贏乏皆濟矣。

馮謙曰。泉府之法。唯封建時可行。今天下一統。官皆無常。不可行也。唯國用軍需。則暫于出產州郡。

置場收買。令遠近以貨自至。所須物足則止。不得至民家強買。其有非次急切軍興。亦各于出產州郡。專委長吏。于有物力上戶內。平價給買。稍有侵違。加以嚴典。庶民無重困乎。○漢初令賈人不得衣絲乘輦。至武帝竭天下之力。幾無以濟。乃令賈人爲官。賴桑弘羊平準之法。得以僅存。董子曰。天亦有所分予。予之齒者。去其角。傳其翼者。兩其足。是受大者。不得取小也。已受大。又取小。天不能足。而況人乎。皇皇求財利。常恐乏匱者。庶人之意也。

皇皇求仁義。常恐不能化民者。大夫之意也。負且乘。致寇至。居君子之位。而爲庶人之行者。其患禍必至也。可謂武帝之要藥矣。○唐之劉晏。亦以通財濟國。然而君子不尚者。以國家經賦。本自足用。多聚財于上。而濟其侈。所謂民賊也。大學曰。長國家而務財用者。必自小人矣。

### 右論平準

龜山楊氏曰。古之制國用者。量入以爲出。故以九賦歛之。而後以九式均節之。使用財無偏重不足之處。

所謂均節也。○先王所謂理財者。非盡籠天下之利而有之也。取之以道。用之有節。各當于義之謂也。取之。不以其道。用之。不以其節。而不當于義。則非理矣。故周官以九職任之。而後以九賦歛之。其取之可謂有道矣。九賦之入。各有所待。如關市之賦。以待王之膳服。邦中之賦。以待賓客之類是也。邦之大用。內府待之。邦之小用。外府受焉。有司不得而侵紊之也。冢宰以九式均節之。下至工事芻秣之微。匪頒好用。皆有式焉。雖人主不得而逾之也。所謂惟王及后世子

不會特膳服之類而已。有不如式。雖有司不會。冢宰得以式論之矣。

朱子答張敬夫書曰。孟子論王道。以制民產爲先。今井地之制。未能遽講。而財利之柄。制于聚歛。措克之臣。朝廷不恤諸道之虛實。監司不恤州縣之有無。而爲州縣者。不復知民間之苦樂。蓋不惟學道不明。仕者無愛民之心。亦緣上下相逼。只求事辦。雖或有此心。而亦不能施也。此由不量入以爲出。而反計費以取民。是以末流之弊。不可勝揅。愚意莫如因制國用。

之名而遂脩其實。明降詔旨。哀憫民力之凋悴。而思所以膏澤之者。令逐州逐縣各具民田一畝。歲入幾何。輸稅幾何。非泛科率又幾何。一縣內逐鄉里不同者。亦依實開州縣一歲所收金穀總計幾何。諸色經費總計幾何。逐項開有餘者歸之何許。不足者何所取之。俟其畢集。然後選忠厚通練之士數人。類會考究。而大均節之。有餘者取。不足者與。務使州縣貧富不至甚相懸。則民力之懽舒。亦不至大相絕矣。然朱子又有與王運使劄子曰。近準使牒奉行詔書。取會

本軍金穀。出納大數。初欲一一從實供申。偶會得池州式樣。官吏皆爲當倣其所爲。可無後悔。遂止。據有正當窠名合收之數。以爲收支之數。而凡州郡多方措畫。以添助支遣者。皆不之載。大約所供纔十之二三。而米糴不在數中也。見欲一例如此供申。然在鄙意。終有未安。蓋聖詔所爲叮嚀。使臺所爲取索。凡以欲知州縣有無之實。而均給之。以寬民力耳。今乃如此。則爲上欺使臺。以及君父。在州郡利害。則恐今旣自謂有餘。後日將不得蒙均給之惠。以病其民也。是

以深竊疑之。未敢不以實對。然官吏之說。則又有二端。其一以爲州郡措置所收窠名。多不正當。恐有詰責。莫任其咎。此則便文自營之計。竊所不敢避也。其一以爲若盡實供具出數。今日固未必實有均給之惠。而盡實供具入數。異時上官所見不同。或將按籍而取之。則州郡必致重困。此則其說不爲無理。而竊有所不敢違也。是以尤竊疑之。又未敢遽以實對。伏念旬日。不能自定。敢以此私干下執事。其後不知遲使所答如何。



樞謀按朝廷于州縣錢糧徹底清查。盡歸京師。終非美事。惟選賢而任之。使多儲積蓄于本地。交盤之數。使本地士民鄉紳共知之。苟貪污著聞。則繩之以法。雖聖王治世。不過如此而已。

嘉靖中詹事霍韜疏曰。臣幸得備官纂修。竊查得洪武初。天下田土八百四十九萬六千頃。弘治十五年。存額四百二十二萬八千頃有奇。失額四百二十六萬八千頃有奇。是宇內額田存者半。失者半也。又備查天下額數。湖廣額田二百二十萬。今

存額二十三萬失額一百九十七萬河南額田一  
百四十四萬今存額四十一萬失額一百三萬此  
又失額極多者也非撥給于藩府則欺隱于猾民  
不然則冊文之訛也何以致此廣東額田二十三  
萬今存額七萬失額十六萬夫廣無藩府之撥給  
疆里如舊非荒虔于寇賊則欺隱于猾民不然亦  
冊文之訛也又何以致此由洪武迄弘治間屢歷  
百四十年耳天下額田減已強半更十百年減失  
又當何如伏望勅行戶部考求洪武初年額田原

數。備查弘治十五年失額田數。今日額田實數。送  
館稽纂。仍乞特召戶部尚書詢之。曰。洪武初年。甫  
脫戰爭。黎庶鮮少。田野荒蕪。田數宜少。而反多。今  
奕世承平。人多生聚。土地開闢。田額宜多。而顧少。  
總國計者。宜若何爲心。天下有受得民賊利。爲欺  
隱額田。蠹國害民。弊無紀極者。來歲造籍冊。獻田  
額數。盍豫思設法處之乎。再按天下洪武初年。戶  
一千六百五萬有奇。口六千五十萬有奇。時甫  
脫戰爭。戶口凋殘。其寡宜也。弘治四年。承平久矣。

戶口蕃且息矣。乃戶僅九百十一萬。視初年減五十四萬矣。口僅五千三百八十萬。視初年減七百二十六萬矣。據上數戶宜減六百七十四萬今亦不合國初戶口宜少而多。承平戶宜多而少。何也。伏願再勅該部。覈實洪武弘治遞年戶口原數。今戶口實數。送館稽纂。俾司國計者。知戶口日減。費用日增。思所以處之也。再按天下藩封。洪武初年。山西惟封晉府一王。歲支祿米一萬石。今增支祿米八十七萬有奇。由一萬石。增八十七萬石。則多加八十七倍矣。攷山

西額田。初年四十一萬頃。弘治十五年存額三十  
八萬頃。失額者三萬頃矣。祿米則由一萬石增而  
八十七萬石。額田則四十一萬頃減而三十八萬  
頃。舉山西而推之。天下可知也。伏願勅行禮部備  
查。洪武初年各省藩封位數幾何。今日位數幾何。  
行戶部備查祿米總數。初年幾何。今幾何。送館稽  
纂。俾司國計者知賦稅日減。祿米日增。思所以處  
之也。再按天下武職。洪武初年二萬八千餘員。成  
化五年增至八萬二千餘員。錦衣衛官。洪武初年

二百一十一員。今增一千七百餘員。由二萬而八萬。增四倍矣。由二百而千七百。增八倍矣。夫額田賦入。則由八百萬減而四百萬。軍職員額。則由二萬增而入萬。然猶成化以前之大畧。弘治後未稽也。伏望勅下兵部。備查洪武年間武職大數幾何。今日大數幾何。類送館稽纂。俾司國計者。知額田減一倍。軍職增四倍。思所以處之也。再按天下文職。洪武初。官有定額。故數易稽。今冗員日多。職守日紊。數亦難稽。昔光武中興。鑒前世冗官之弊。裁

省天下州四百。官止七千五百餘員。額數極少者也。唐制文武官一萬八千八百餘員。額數極多者也。我朝自成化五年。武職逾八萬矣。合文職計之。逾十萬。是職員極冗。未有甚于此時者也。伏望勅下吏部。詳洪武年間文職幾何。今冗員幾何。裁革幾何。通文武職員幾何。送館稽纂。俾司國計者。知官逾多。則國逾困。而民逾病。思所以處之也。今天下猶一家也。處天下猶夫處家也。千金之家。一人焉。享之。其百費饒裕宜也。再世有五人焉。則二百

金之家矣。又再世五人焉。則四十金之家矣。以四十金之家。而復仍千金之費。先業不立墜乎。祖宗創業之初。猶夫億萬金之家也。宗藩之分封。猶子孫也。百官工作也。內臣臧獲也。軍士猶守家之犬也。歲費供億。則其家之調度也。率是數者。皆如祖宗之舊。然且必弊。奈之何耗財者。年積歲滋。不知幾倍其益。生財者。日消月磨。不知幾倍其損。是猶承千金之後。已落爲二百金之家。而妄意夫千金之費也。幾何而不窮乎。所望陛下早計豫思。日慎



一日心由此正念由此窒克已復禮之目由此而堅。所天永命之道由此而致。幸甚。

馮謙按此疏言國計甚明。覽者以三隅反。則經費雖廣。可指畫而陳矣。然人君處盈絀之道。不可不審也。當國計之盈。固當戒其侈心。勿爲妄費。然亦當小疏通之。或惠鰥寡。或興禮樂。毋務厚藏。以滋後人之侈。當國計之訕。固當量入爲出。愛養樽節。清查耗蠹。仍當褒示寬大。不可唯務裁削。以啓亂源。嘗見父老言崇禎間流寇之起。始于裁革驛傳。

固當慎也。

右通論

節儉

程子曰。仁宗一日思生荔枝。有司言已供盡。近侍曰。有鬻者。請買之。上曰。不可。令買來。歲必增上供之數。流禍百姓無窮。又一日夜中甚饑。思燒羊頭。近侍乞宣取。上曰。不可。今天取之後。必常備。日殺三羊。暴殄無窮。竟夕不食。

元城劉氏曰。仁宗恭儉出于天性。故四十二年如一。

日也。蓋所謂有始有卒者。世以明皇初節儉。後奢侈。疑相去遼絕。此說非也。此正是一人見識耳。夫錦繡珠玉。世之所有。已不好之。則不用。何至焚之。焚之必於前殿。是欲人知之。此好名之弊也。夫恭儉不出于天性。而出于好名。好名之心衰。則其奢侈必甚。此必至之理也。故當時識者。見其焚珠玉。知其必有末年之弊。若仁宗則不然。若非大臣問疾。則無由見其黃袍被。漆唾壺。

馮謙曰。珠玉錦繡。物之貴者也。焚而棄之。如土芥。

此正其性之奢處。

朱子曰。先聖之言治國而有節用愛人之說。蓋國家財用皆出于民。如有不節而用度有闕。則橫賦暴斂。必將有及于民者。雖有愛人之心。而民不被其澤矣。是以愛人者。必先節用。此不易之理也。

東萊呂氏曰。古人自奉簡約。類非後人所能及。如飲食高下。自有制度。諸侯無故不殺牛。大夫無故不殺羊。士無故不殺犬豕。此猶是極盛時制度也。大抵古人得食肉者至少。如食肉之祿。冰皆與焉。肉食者謀

之肉食無墨。此言貴者方得肉食也。比之後人。簡約多矣。

魯齋許子曰。地力之生物有大數。人力之成物有大限。取之有度。用之有節。則常足。取之無度。用之不節。則常不足。生物之豐歉由天。用物之多少由人。○天地間爲人爲物。皆有分限。分限之外。不可過求。亦不得過用。暴殄天物。得罪于天。

五學胡氏曰。上侈靡而細民皆衣帛食肉。此饑寒之所由生。盜賊之所由作也。天下如此。上不知禁。又益

甚焉。然而不亡者。未之有也。

楊謙曰。國之用財。必有節者。非徒儉而已。官府之制。必有法式。限量。不得踰溢。如庶民不得衣絲。品官不得織金。宴享祭祀。簋豆有額。民間不得倩厨人茶使。婦女不得擅用珠翠。皆所以使上下有章。而裕生財之源也。曰不嚴而令行。如之何。曰節自上始。

### 救荒

朱子曰。自古救荒有兩說。第一是感召和氣。以致豐

積其次只有儲蓄之計。若待他餓時理會。更有何策。  
○救荒之策。蠲除賑貸。固當汲汲于其始。而撫存休  
養。尤在謹之于其終。譬如傷寒大病之人。方其病時。  
湯劑砭灸。固不可以少緩。而其既愈之後。飲食起居  
之間。所將護節宣。少失其宜。則勞復之證。百死一生。  
尤不可以不深畏也。○黃直卿云。制度雖只是這個  
制度。用之亦在其人。如糴米賑饑。此固是。但非其人。  
則做這事。亦有不及事之患。曰然。○嘗謂爲政者。當  
順五行。修五事。以安百姓。若曰賑濟于凶荒之餘。繼

饒措置得善。所惠者淺。終不濟事。○賑饑無奇策。不如講求水利。到賑濟時。成甚事。

象山陸氏曰。社倉固爲農之利。然年常豐。田常熟。則其利可久。苟非常熟之田。一遇歉歲。則有散而無斂。來歲種糧時。乃無以賑之。莫若兼置平糴一倉。豐時糴之。使無價賤傷農之患。闕時糴之。以推富民。閉廩騰價之計。析所糴爲二。每存其一。以備歉歲。代社倉之匱。實爲長利也。

馮謙曰。朱子救荒法。載本傳見前。



禮樂

程子伊曰。禮只是一個序。樂只是一個和。只此兩字。

含蓄多少義理。天下無一物。無禮樂。且置兩隻椅子。纔不正。便是無序。無序便乖。乖便不和。○學禮者考文。必求先王之意。得其意。乃可以沿革。○禮之本出于民之情。聖人因而道之耳。禮之器出于民之俗。聖人因而節文之耳。聖人復出。必因今之衣服器用。而爲之節文。○行禮不可全泥古。須當視時之風氣。自不同。故所處不得不與古異。若全用古物。亦不相稱。

雖聖人作。須有損益。○禮院關天下之事。得其人。則凡舉事。可以考古而立制。非其人。未免隨俗而已。○先王之樂。必須律。以致其聲。今律既不可求。人耳又不可全信。正唯此爲難。求中聲。須得律。律不得。則中聲無出見。律者自然之數。至如今之度量權衡。亦非正也。今之法。且以爲準。則可。非如古法也。此等物。雖出于自然。亦須人爲之。但古人爲之。得其自然。至於規矩。則竭盡天下之方圓。

張子曰。禮但去其不可者。其他取力能爲之者。○古

性理大全 卷之六 聖人無倚桌。智非不能及也。聖人之才。豈不如今人。但席地則體恭。可以拜伏。今坐倚桌。至有坐到起。不識動者。主人始親一酌。已是非常之敬。蓋後世一切取便安也。

馮謙曰。不特如此。垂足而坐。則精神緩散。

又曰。古樂不可見。蓋爲今人求古樂太深。始以古樂爲不可知。只以虞書詩言志。歌永言。聲依永。律和聲。求之得樂之意。蓋盡于是。

馮謙按何氏塘解詩言志四句。實爲有理。其言曰。

自明良之歌。以至三百篇之作。今尚可考。莫非各陳其情。是之謂詩言志。詩既成矣。其吟詠之間。必悠揚宛轉。有清濁高下之節。然後可聽。是之謂歌永言。當歌之詩。欲和之以樂器之聲。其樂聲之清濁高下。必與歌聲之清濁高下相應。是之謂聲依永。俗聲唱曲之時。或吹竹彈絲。與之相應。乃其遺法也。並奏衆音。清濁高下。難得齊一。須用律以齊之。如作黃鐘調。則衆音之聲。皆用黃鐘爲節。作太簇調。則衆音之聲。皆以太簇爲節。然後清濁高下。

自齊一而不亂。俗樂以合四一尺上工爲板眼。乃其遺法也。此說最爲簡盡。余有古樂書。從蔡氏新書另有考定。推此法行之。節序衆音。爲二十四卷。有知音者。可舉而行也。

又曰。古樂所以養人德性中和之氣。後之言樂者。止以求哀。故晉平公曰。音無哀于此乎。哀則止。以感人。不善之心。歎亦不可以太高。亦不可以太下。太高則入于噍殺。太下則入于嗶緩。蓋窮本知變。樂之情也。朱子曰。天叙有典。勅我五典。五惇哉。天秩有禮。自我

五禮有庸哉。這個典禮自是天理之當然。欠他一毫不得。添他一毫不得。惟是聖人之心。與天合一。故行出這禮。無一不與天合。其間曲折厚薄淺深。莫不恰好。這都不是聖人白撰出。都是天理決定合著如此。後之人此心未得似聖人之心。只得將聖人已行的。聖人所傳于後世的。依這樣子做。做得合時。便是天理之自然。○漢時如大射等禮。雖不行。却依舊令人習。人自傳得一般。今雖是不能行。亦須是立一科。令人習得也是一事。○禮卽理也。但謂之理。則疑若未

有形迹之可言。制而爲禮。則有品節文章之可觀矣。  
○問冠昏之禮。如欲行之。當須使冠昏之人易曉。其  
言乃爲有益。如三加之辭。出門之戒。若只以古語告  
之。彼將謂何。曰。只以今之俗語告之。使之易曉。乃佳。  
○聖人有作古禮。未必盡用。須別有個措置。視許多  
瑣細制度。皆若具文。且是要理會大本大原。曾子臨  
死。丁寧說君子所貴乎道者三。動容貌。斯遠暴慢矣。  
正顏色。斯近信矣。出辭氣。斯遠鄙倍矣。籩豆之事。則  
有司存。上許多。正是大本大原。如今所理會許多。正

是籩豆之事。曾子臨死。敎人去不要理會這個。夫子焉不學。而亦何常師之有。非是孔子如何盡做這事。到孟子已是不說到細碎上。只說諸侯之禮。吾未之學也。吾嘗聞之矣。三年之喪。齋疏之服。饘粥之食。自天子達於庶人。這三樣便是大原大本。○古禮繁縟。後人於禮日益疎畧。然居今而欲行古禮。亦恐情文不相稱。不若且只就今人所行禮中刪修。令有節文。制數等威足矣。古樂亦難遽復。且如今樂中去其噍殺促數之音。并攷其律呂。令得其正。更令掌詞命之。



官製撰樂章。其間略述教化訓戒。及賓主相與之情。及如人主待臣下恩意之類。令人歌之。亦足以養人心之和平。○古者教法。禮樂射御書數。不可闕一。就中樂之教。尤親切。夔敎冑子。只用樂。大司徒之職。也是用樂。蓋是敎人朝夕從事于此物。得心長在這上面。蓋爲學有節奏。學他的急也不得。慢也不得。久之都換了他一副當情性。○今之士大夫。問以五音十二律。無能曉者。要之當立一樂學。使士大夫習之。久後必有精通者出。○今人都不識樂器。不聞其聲。故

不通其義。如古人尚識鍾鼓。然後以鍾鼓爲樂。如孔子云。樂云。樂云。鍾鼓云乎哉。今人鍾鼓已自不識。○樂律自黃鍾至仲呂。皆屬陽。自蕤賓至應鍾。皆屬陰。此是一個大陰陽。黃鍾爲陽。大呂爲陰。太簇爲陽。夾鍾爲陰。每一陽間一陰。又是一個小陰陽。○乞修三禮。劄子曰。臣聞之六經之道同歸。而禮樂之用爲急。遭秦滅學。禮樂先壞。漢晉以來。諸儒補輯。竟無全書。其頗存者。三禮而已。周官一書。固爲禮之綱領。至其儀法度數。則儀禮乃其本經。而禮記郊特牲冠義等

篇。乃其義疏耳。前此猶有三禮通禮樂究諸科。禮雖不行。而士猶得以誦習而知其說。熙寧以來。王安石變亂舊制。廢罷儀禮。而獨存禮記之科。棄經任傳。遺本宗末。其失已甚。而博士諸生。又不過誦其虛文。以供應舉。至於其間。亦有因儀法度數之實。而立文者。則咸幽冥而莫知其源。一有大議。率用耳學臆斷而已。若乃樂之爲教。則又絕無師授。律尺短長。聲音清濁。學士大夫。莫有知其說者。而不知其爲關也。故臣頃在山林。嘗與一二學者。考訂其說。欲以儀禮爲經。

而取禮記及諸經史雜書所載有及于禮者。皆以附于本經之下。具列註疏諸儒之說。略有端緒。而私家無書檢閱。無人抄寫。久之未成。會蒙除用學徒分散。遂不能就。而鍾律之制。則士友間亦有得其遺意者。竊欲更加參考。別爲一書。以補六藝之闕。而亦未能具也。欲望聖明。特詔有司。許臣就秘書省。關借禮樂諸書。自行招致舊日學徒數十人。踏逐空閒官屋數間。與之居處。令給飲食紙札油燭之費。其抄寫人。卽乞下臨安府。差撥貼書二十餘名。候結局日。量支犒

設別無推恩。則於公家無甚費用。而可以興起廢墜。垂之永久。使士知實學。異時可爲聖朝制作之助。則斯文幸甚。取進止。

摛謙按。凡日用之禮。經禮也多見于禮記。遇事而行之。有時者。儀禮也。二者須分而觀之。終不可合。合則必有。若儀禮之繁。而并經禮。束而不觀者矣。北溪陳氏曰。禮樂有本有文。禮只是中。樂只是和。中和是禮樂之本。然本與文二者不可一闕。禮之文如。俎豆玉帛之類。樂之文如。聲音節奏之類。須是有這。

中和而文以玉帛俎豆。聲音節奏。方成禮樂。○禮樂無所不在。所謂明則有禮樂。幽則有鬼神。如何離得。如盜賊至無道。亦須上下有統屬。此便是禮的意。纔有統屬。便自相聽從。自相和睦。這便是樂的意。又如行路人。兩個同行。纔存个長少次序。長先少後。便相和順而無爭。其所以有爭鬪之心。皆緣是無个少長之序。先自亂了。安得有和順的意。○人徒見升降揖讓。有類于美觀。鏗鏘節奏。有近乎末節。以爲禮樂若無益于人者。不知釋回增美。皆由于禮器之大備。而

好善聽過。皆本于樂節之素明。禮以治躬。則莊敬不期而自肅。樂以治心。則鄙詐不期而自銷。蓋接于視聽者。所以養其耳目。而非以娛其耳目。形于舞蹈者。所以導其血氣。而非以亂其血氣。則禮樂之用可知矣。

### 學校

程子曰。古者八歲入小學。十五入大學。擇其才可教者聚之。不肖者復之。田畝。蓋士農不易業。旣入學。則不治農。然後士農判。在學有養。若士大夫之子。則不

慮無養。雖庶人之子。旣入學。則亦必有養。古之士者。自十五入學。至四十方仕。中間自有二十五年學。又無利可趨。則所志可知。須去趨善。便自此成德。後之人自童穉間。已有汲汲趨利之意。何由得向善。故古人必使四十而仕。然後志定。只營衣食。却無害。惟利祿之誘。最害人。人有養。便方定志于學。○古者家有塾。黨有庠。三老坐于里門。察其長幼出入揖遜之序。詠歌諷誦。無非禮義之言。今也上無所學。而民風日以偷薄。父子兄弟。惟知以利相與耳。以古所習如彼。欲



不善得乎。以今所習如此。欲其善得乎。○生民之道。以教爲本。故古者自家黨。遂至于國。皆有教之之地。民生八年。則入于小學。是天下無不教之民也。

朱子曰。昔者聖人作民君師。設官分職。以長以治。而其教民之目。則曰父子有親。君臣有義。夫婦有別。長幼有序。朋友有信。五者而已。蓋民有是身。則必有是五者。而不能以一日離。有是心。則必有是五者之理。而不可以一日離也。是以聖王之教。因其固有。還以導之。使不忘乎其初。然又慮其由而不知。無以久而

不壞也。則爲之擇其民之秀者。羣之以學校。而聯之以師儒。開之以詩書。成之以禮樂。凡所以明是理而守之不失。傳是教而施之無窮者。蓋亦莫非因其固有而發明之。而未始有所務于外也。夫如是。是以其教易明。其學易成。而其施之之博。至于無遠之不及。而無微之不化。此先王教化之澤。所以爲盛而非後世所能及也。○古者學校選舉之法。始于鄉黨。而達于國都。教之以德行道藝。而興其賢者能者。蓋其所以居之者無異處。所以官之者無異術。所以取之者

無異路。是以士有定志而無外慕。蚤夜孜孜。惟懼德業之不脩。而不憂爵祿之未至也。若夫三代之教。藝爲最下。然皆猶有實用。而不可闕。其爲法制之密。又足以爲養心治氣之助。而進于道德之歸。此古之爲法。所以成人材而厚風俗。濟世務而興太平也。○道不遠人理。不外事。故古之教者。自其能食能言。而所以訓導整齊之者。莫不有法。而況于家塾黨庠。遂序之間乎。彼其學者。所以入孝出弟。行謹言信。羣居終日。德進業脩。而暴慢放肆之氣。不設于身體者。由此

故也。○天生斯人。而予之以仁義禮智之性。而使之有君臣父子夫婦兄弟朋友之倫。所謂民彝者也。惟其氣質之稟。不能一于純秀之會。是以欲動情勝。則或陷溺而不自知焉。古先聖王爲是之故。立學校以教其民。而其爲教。必始于洒掃應對進退之間。禮樂射御書數之際。使之敬恭朝夕。脩其孝弟忠信。而無違也。然後從而教之格物致知。以盡其道。使之所以自身及家。自家及國。而達之天下者。蓋無二理。其匡直輔翼。優柔漸漬。必使天下之人。皆有以不失其

性不亂其倫。而後已焉。

南軒張氏曰。先王所以建學造士之本意。蓋將使士者。講夫仁義禮智之彝。以明夫君臣父子夫婦昆弟朋友之倫。以之脩身齊家治國平天下。其事蓋甚大矣。而爲之則有其序。教之則有其方。故必先使之從事于小學。習乎六藝之節。講乎爲弟爲子之職。而躬乎洒掃應對進退之事。周旋乎俎豆羽籥之間。優游乎弦歌誦讀之際。有以固其肌膚之會。筋骸之束。齊其耳目。一其心志。所謂大學之道。格物致知者。由是

可以進焉。至于物格知至。而仁義禮智之彝。得于其性。君臣父子夫婦兄弟朋友之倫。皆以不亂。而脩身齊家治國平天下。無不宜者。此先王之所以教。而三代之所以治。後世不可以跂及者也。後世之學校。朝夕所講。不過綴緝文辭。以爲規取利祿之計。亦與古入之道大戾矣。上之人所以教養成就之者。夫豈端爲是哉。○三代之學。至周而大備。自天子之國都。以及于鄉黨。莫不有學。使之朝夕優游于弦誦詠歌之中。而服習乎進退揖遜之節。則又申之以孝弟之義。

爲之冠昏喪祭之法。春秋釋菜。與夫鄉飲酒養老之禮。其耳目手足。肌膚之會。筋骸之束。無不由于學。在上則司徒總其事。樂正崇其教。而鄉黨亦莫不有師。其教養之也密。故其成材也易。士生斯時。藏脩游息于其間。誦言而知味。玩其文而會其理。德業之進。日引月長。自宜然也。于是自鄉論其行而升之司徒。司徒又論之而升之國庠。大樂正則察其成以告于王。定其論而官之。其官之也。因其才之大小。蓋有一居其官。至于終身不易者。士脩其身而已。非有求于君。

也。身脩而舉之耳。夫然。故禮義興行。人材衆多。風俗醇厚。至于班白者。不負戴于道路。而王道成矣。

東萊呂氏曰。學校之設。非爲士之貧而食之也。又非欲羣其類而習爲文辭也。不農不商。若何而可以爲士。非老非釋。若何而可以爲儒。事親從兄。當以何者爲法。希聖慕賢。當自何門而入。道德性命之理。當如何而明。治亂興衰之故。當何由而達。考之古以爲得失之鑒。驗之今以爲因革之宜。此士之所當用心也。西山真氏曰。按古教法。其近民者。教彌數。故二十五



家爲閭閻有塾。民朝夕處焉。四閭爲族。則歲之讀法者十有四。法者何。大司徒所頒之三物也。士生斯時。不待舍去桑梓。而有學有師。敬敏任恤。則閭胥書之。孝弟睦姻。則族師書之。其所以教。又皆因性牖民。而納諸至善之域。禮鎔樂冶。以成其德。達其材。古者作人之功。益如此。然士之于學。豈特處庠序爲然哉。雞鳴鳳興。嚮晦宴息。皆學之時。微而暗室。屋漏顯而鄉黨朝廷。皆學之地。動容周旋。洒掃應對。皆學之事。知無時之非學。則晝而有爲。夜而計過者。其敢懈知無。

地之非學。則警于冥冥。惕于未形者。其敢忽。知無事之非學。則矜細行。勤小物者。其敢或遺。

魯齋許子曰。文公小學四書次第本末甚備。有王者起。必須取法。

撫謙曰。至洪武中。其言遂驗。始立學宮。祀先師。府學置生員四十人。縣學各二十人。作尊經閣以藏書。作明倫堂以開講。作學舍以招來學者。使誦讀于其中。立教官教諭以爲之師。設廩祿以繕其食。月課其業。而又設提學以爲之進退。又時簡其孝

第惇行者。以爲行優。簡其不率教者。以爲行劣。所以整齊士風。法至詳也。至其後。學徒益廣。教乃漸廢。但取士之日暮途窮者。以爲教官。一切教養無聞。士有入學者。止令齋役徵其束脩贄儀而已。師道廢而士習益以不振。吁。悠悠蒼天。此何人哉。

臨川吳氏曰。古者盛時。萬二千五百家之鄉。有鄉學。鄉大夫主之。頒教法于州黨族閭。俾教其民。二千五百家之州。則州長屬民讀法。以時習。鄉射于學而尚功。五百家之黨。則黨正屬民讀法。以時習。鄉飲酒于

學而尚齒。雖二十五家之間。巷口亦有塾。閭內致仕之老。朝夕坐其中。民之出入者。必受教。此所以致成俗善。而人人有士君子之行也。

搗謙曰。欲種苗者去莠。欲養民者去奸。欲養士者必去奇袤。遊冶放浪。鑽刺橫議之習。而後學校可清也。○教人之法。經書皆有畫一之說。不許淆亂。而後學術始一。○孟子曰。上無禮。下無學。賊民興。喪無日矣。萬曆時爲賊民之先者。李贄是也。今其書遍于天下。欲人心之正。其可得乎。○淫書之賊。

性理大全 卷之十九  
人也。過于耽毒。使之遍坊市而不禁。則司學之罪也。○士必養而後可教。

### 人才

程子曰。善言治者。必以成就人才爲急務。人才不足。雖有良法。無與行之矣。欲成就人才者。不患其稟質之不美。患夫師學之不明也。師學不明。雖有美質。無由成之矣。

龜山楊氏曰。戰國之士。務奇謀而不循正道。西漢之士。喜功名而不務奇節。東漢之士。貴節義而不通。

變西晉之士。樂恬曠而不孚實用。是皆爲世變所移。而昧夫中行者也。惟古之聖賢則不然。不以世治而堅其操。世亂而改其度。雖變故日更。而吾之所守自若也。○周之士貴。秦之士賤。周之士非獨上之人貴之。士亦知自貴焉。秦之士非獨上之人賤之。士亦輕且賤焉。自秦而來。迄于今。千有餘歲。士之知自貴者。何其少。而輕自賤者。何多耶。蓋古之士雖一介之賤。廁于編戶齊民之間。短褐不完。含菽飲水。裕然有餘。而不知王公之爲尊。與夫膏粱文繡之爲美也。三

性理大全  
卷之十九  
施之位。非其道也。有弗屑焉。萬金之餽。非其義也。有弗受焉。夫如是。上之人雖欲挾貴自尊。以輕天下之士。其可得乎。後世之士。顛冥利欲。而不知有貴于己者。故守道循理之志薄。而偷合苟得之行多。伺候公卿之門。奔走形勢之塗。脅肩諂笑。以取容說。其自處如此。而欲人貴之。其可得乎。故愚謂士之貴賤。雖視世盛衰。然所以貴賤者。皆其自取也。

性理大全卷之十九終